

Minister Michelle Hooyboer-Winklaar a regala Gerrit Rietveld Akademie un recuerdo simbolico



RIBA e prome dia cu a cuminsa duna les n'e "vooropleiding" di Gerrit Rietveld Akademie na Aruba. Minister encarga cu cultura a repasa e historia bunita di Gerrit Rietveld Akademie na Aruba.

Maske cu e edificio aki, cual a haña e nomber di De Olifant, ta temporal, tog a start e curso aki cu hopi entusiasmo y dedicacion riba e fecha manera palabra cu e academia madre na Amsterdam, esta dia 2 di november.

Ta for di aña pasa a cuminsa e tramitenan pa logra haña Gerrit Rietveld Akademie, e scol di arte mas prestigioso di Hulanda, aki na Aruba. Nos ta bira e prome pais separa di Hulanda cu ta conta cu un Gerrit Rietveld Akademie mundialmente conoci.

A invita Minister Michelle Hooyboer-Winklaar pa bishita e academia na luna di mei ultimo y asina e mes por a presencia con e sistema ta funciona na e scol. A papia cu diferente docente, incluyendo un estudiante di Aruba, esta Robin de Vogel. Un hecho cu no por keda sin menciona ta cu 50% di e studiantenan na GRA na Amsterdam ta procedente di otro pais.

Esey ta nifica cu e interes den mundo cultural-artistico ta grandi y Aruba lo por atrae studiantenan p'e "Bachelor" di paisnan den region y den Sur

America. Tambe studiantenan Mericano lo por ta interesa pa sigui nan estudio aki na Aruba.

Den cuadro di su maneho economico, Minister Hooyboer-Winklaar ta poniendo hopi enfasis riba e asina yama "Creative Industries". Den esaki, establecimiento di Gerrit Rietveld Akademie, Bienale di Arte na caminda y construccion di un Museo pa Arte Moderno na 2012 ta parti esencial di su maneho.

E nomber Gerrit Rietveld Akademie no ta desconoci na Aruba, pasobra un cantidad di nos artistanan local, ta procedente for di e academia aki. Pa nan e ta trece un sin fin di oportunidad nobo, manera di por duna les n'e studiantenan of pa por manda hobennan talentoso studia na Aruba mes, enbes di manda nan te Hulanda. No tin nada mihor cu studia den bo mesun ambiente, na bo isla y mey mey di bo hendenan y cu aspectonan di bo propio cultura.

Na ocasion di inicio di e prome dia di e "vooropleiding" di Gerrit Rietveld Akademie na Aruba, e hoben Joshua Ras, diseñador di Tera Group N.V. a diseña un poster masha yamativo, cu Minister Michelle Hooyboer-Winklaar a regala como recuerdo pa colga n'e murayanan bashi ainda na Gerrit Rietveld Aruba.

